

# Uurasi

## *Iyoteparia*

---

### **Uurasi teepotewari**

<sup>1</sup>¡Kúíraa yomatiame Riosie Weratiamechiwikame, yomatiame pukachi paparamé! Neeea Uurasi tewaniamenia, Riosie Weratiamechi tekipaname, Saantiao yeeyerachi naawakame tiame. I'ka iyojura iyotesa uhjurenania, yooma aamoo tewekachi kahtiame Noonoe paajutetiameo, ahpo ijinuwa enemichioo, yooma aamo taamo Noonoe tísia neesetoniamé ahpo ijinuwa enepateriopaopua, ahpo Taana Eesusichi tísia paparakopaopua. <sup>2</sup>Yooma aamoo neeea pukaéo, ki nu'uti kaaweruma tiame teerejeraninia amochio, tísia ta'iria erakoka mochtomichiopua aamo iikachio. Aamo ku'ijeraninia tiameo, aamo tísia nakika mochtonekichio aamo wahjachioi.

### **Wistuki ma'masitiame**

*(Peero Oosa Iyoteparia 2:1-17)*

<sup>3</sup>No'o Riosichi poponiwa pipiniwa tiamée, taamo newiparichi simiyame tísia aamo nayewemo o'rainia, nape ohso kaawe paparanichi simiyamekamera aamo nayewemania, pu'kakamera tísia nakiwiamekopua nehpuapuapuo. Pu'kakamera aamo utewaeme chaaniamenia, aamo pu'kakamera utewaeme teetomichiopua pu'ka nehpuakao, Riosi te'ta kaaweruma tuuyewari pichiwarikámera. Riosia i'ka pichiwari ki seenampa sewina ikiyame, ki'yakamepua ahpo ijinuwao. <sup>4</sup>I'ka aamo chaaniame neeea, muuwaeme weeechi siikuarichitia amochi muipariopao, Riosi te'ta pichiwarichi simiyame se'wika masitiameo. Puuuu, ka'chi ikiniameko tuuyamepua ihtaoi ki kaaweruma iintotiaio, Riosieopua taamo cheriweniamekopao, ihtatakori iintotioiopua. Puuuu ki masitiamepua Riosie te'ta newipaniameo, Riosichi te'ta paparaniaméoi. Puuuu tísia iinya tiame nokakao, ukana ajatoamepua taamo te'ta Paamirakamera taamo Teekoo, apoe te'ta taamo Paamira Eesusio, Riosie Weratiameo. Nape

pu'ka wa'a nokayameo, ki ehpesi ehkoriaami o'inia Riosia Iyoterichio, ki nu'uti kokosamio tuuyamepua.

<sup>5</sup>Aamo nane'reka mochikoioepua i'k'ao, aamo chaanemaniamia eenechio. Taamo Noonoo tewekachi kahtiamio, ehkoriaami taamo noonori Eejito mochikame puuyanakoio, yomatiamie apochi paparakamekooio, neipamioepua yooma pu'k'ao, toakamekopua pu'k'ao apochi paparao, wahjipaterepua pu'k'ao. <sup>6</sup>Riosia ahkasi ahpo tewekachi mochikame ki kaawe noonokame ahpo ku'iwarioi, ahpo ki iyoriameopua, tukapachi kaarenae purisa iinuemepua pehjo, ahkasi asiyachisi pu'ka ahpo te'ta kokosamia taawechio. <sup>7</sup>Naati ma'masitari Riosi te'ta pichiwarichi simiyame sewinatamea, puuua wa'a nokayaio Riosie tísia kokosapuaitepua, ehkoriaami Sooroma mochiwari kokosaretiachitia, Oomora mochiwari kokosaretiachitia tiame, wahjachi yooma norikame mochiwari mochikamechitia ahjamachitia tiamé, itapiti tísia iinyatiame yooraka mochiriamekopaopua, kiisioi nokime tiame nokaka mochitorioapa. Pukaepa wa'a noonoikapa puuua, ki nu'uti kokosari na'ie aiwatetiamepua Riosieo. Puuu wa'a iintoka kokosatiame Riosieo, Ehkoriaami Iyoterichi iyotetiamea, taamo Riosichi iyoriwa te'ta neesetoka mochitomichio ikitiamepua, ki wa'achitia na'ie taamo kosoka kokosapuawichioepua, ki wahjiamie kokosarichio.

<sup>8</sup>Puuu ma'masitari Riosi te'ta pichiwarichi simiyame se'wika masitiamea, nane'riamekai na'ie kokosatiameopua kiisi iyoriameopua Riosichio, wa'api teetoamepua ahpo weerewachi tísia iinya tiame ahpo na'ataka nokisikao, itapiti iinyatiamee suweporitiamioi yorasika. Puuua kiisi aaata yooreka mochitoamepua, ihtaoi te'ta iyoriwa yoorewaopua, ahkasi te'ta Riosi iyoriwaoioepua na'areka tetewamepua, ahkasi Riosie tewekachi ku'kuiwari utewariraoioepua tísia na'areka kiisi iyoriamepua, ahkasioi Satanasioi na'areka. <sup>9</sup>Nape Apoe Mihkeai, Riosi te'ta ku'iwarikaipua, ki te'yarepua Satanasio, ki reesiseriemekapaopua Riosieo,



*Sooroma muuwaria Riosie kokosatiame, moroka po'ipua Riosio na'ie kosoka tajenapuriopa. (1:7)*

Moise weerewa iintoriarekooichi simiyame chaachapanioio, wahka ihtoriachi ehkoria mio, Mihkea oowera eee chaanerechepua pu'kao: "Aamoo Riosikamera apoe aamo terimeripua, neea ka'i." <sup>10</sup> Ihji ma'masitari te'ta Riosi pichiware se'witaka mochitoamea, ihtaoi itapiti ki pahitiaio, na'areka naewamepua, kihta machiaipua pu'kao. Nape puua ahpo tísia weerewachi ikotuwae erakoawaeopua, animarichitia nokayamechitia nokayamepua, a'chikoi nokaka suwepori, ahpo weerewa na'atamepua, ahpochitia tijeochi kunapakao uuwasari chewipakao, ooweruchioi uupitaka uuwasari chewipakaopua.

<sup>11</sup> Nape ai puua wa'a iintokameapua, tísia iinya tiame ko'koame yekika wahjipameripua. Puua tísia na'ara nokayamepua ahpo piirechio, ehkoria mi Kaaini ahpo pooni me'yariamechitia. Puua ehkoria mi Waarami iintoriachitia nokayaepua tiameo, puua tahpitika erakoamekapapua toomichio, noriwi ku'ipamo e'rakame i'isaeri seepurawakamera newitomichio. Puua ma'masitari Riosi te'ta pichiwarira se'wichamea, ehkoria mi Koorea ikiriachitia ijikimeripua, Riosio, puua Moise paamiratuwa wa'inekamekapaopua wenejikao, weee wahjora rupitutetiameopua, Riosio. <sup>12</sup> Ihji ma'masitaria, iinya nokayamepua aamo Eesusichi iyoriwa ko'kopoi napawiriachi e'énapakao, tahpitika erakoka eejenapamekopapua, tísia posakache ko'konarekaopua. Puua ki ka'karuma ma'masitaria, ki ka'karuma tepuyameka te'teriamepua, puua sapoori ahpo tepuya ko'konaresoopua, ahpo tepuyao toisa uujumapamepua, ahpo chekamerache kaawe neesetopaka. Puua toomarika te'teriamepua tiameo, kihta neeroi iinueme eekae i'toniame. Puua tiameo, itapiti oowara taakiami ki taakiameka te'teriamepua. Puuapa, itapiti oowara wakipaka oosa wahjipakameka te'teriamepua, yomatiamé nawapuka ko'rinatiame. <sup>13</sup> Puua tiameo, pa'weka nokayamepua, ahpo tahpitika ihsika pe'konieo, ahpo toonewatae ahpo tísia maapori ihsiya tetewitiame. Ihji so'pori wewekamepua, ki nu'uti tukaparichi uumpakame. Puua ki kaawe wa'a nokayamea, ahkasi ki wahjiamesi tukaparichi mochimichio, kokosatiamepua aiwamichio.

<sup>14</sup> Eenoko ehkoria miai, Aarani oowisani neipa tijeoturichi naawakameai, i'ka na'ara nokayame ti'tijoerio, cheka nayewariaipua: "No'o Riosi Paamirao tetewakania, kí ookapi mi'miri ti'tijoeri piipakame yeetoka eename, <sup>15</sup> Apoe Paamirao yooma ti'tijoeri katewemia eename, yooma pu'ka ti'tijoeri ki kaawe noonoikame, yooma na'ara nokaka tatakoriame, yooma pu'ka ti'tijoeri weechi ohjoriameo, taamo Paamira Eesusi na'arekameo." <sup>16</sup> Ihji ti'tijoeriai ehpe taawechiamioi, wa'achi chaachapamepua, yooma ihtaoi Riosichi simiyame ki kaawe chaachapakao, tísia na'arekaopua tiame. Yooma ihtaoi ki ta'iria mochiko tuuyamepua; ahpoche erakoa

ikotuka i'yamepua; ahpo oisa e'reka, weeru nayewame; peenia chaachapemepua aaatao, oowera ahpo yoramichio ahpo nakiyao.

### **Kaaweruma tuuyewari**

<sup>17</sup>Pukaepa eeme tísia no'o nakiyaa, ka'te natakepamitia eemea, pu'ka Eesusi ajawariae aamo masiteretiao. Puuu ajawaria aamo masiterepua, itapiti simiyameo ikimeripua, ke'chu ikimiachiopua. <sup>18</sup>Aapoeo aamo chaaneka nayeweriaipua, kajuyachi taawechiamiopua, e'enamio tuuka, Riosi nanaarameopua, ahpoche weemua, na'ara nokayame. <sup>19</sup>Ihjipu ti'tijoea oowerua tiame, aamo poanatumichio nokayamea, oowera i'ka weechi iintuame pu'serewache inatamepua, kihta yasitoamepua apochio, Riosichi eenameopua Riosiwario.

<sup>20</sup>Nape eeme tísia no'o nakiyaa, utewaeme Riosichi mochtomitiapua, epeche epecheche ahjachi erakoka, Riosichiopua. Eemea Riosichi nayewiaipua, Riosi Riosiwari amochi e'raka, nayewepuapua. <sup>21</sup>Nape eeme Riosi Riosiwari amochi yachatoamea, Riosi nakiwarichiche teetoka mochtopuapua, puuyetoka ahkasi pu'ka Eesusi Riosie Weratiame eenechi eenachisio, aamo ki wahjame ahjari aamo kiamiachisio, pu'kao Riosio, aamo tesiwa e'riamekapa aamo kiamiao.

<sup>22</sup>Aaata i'ka weemera ahjari ki apochi tiame erakoameopua, oowera erapuatepuapua pu'kao, pichiwa Eesusichi paparame enesoo ahpo tatakorriria cheriwepuawichioo, pichiwa iinuemeriko tuuyepuapua, Riosie ahpo kiapuameopua weemera ahjario. <sup>23</sup>Aaata eeyowati mochtameopua Riosie ahpo kokosapuameo, tesiwa e'reka ku'ipuapua pu'kao, Riosi kokosari na'irachi puuyanamechitiaopua, tísia kaawe tuuyeka pu'kao, te'ta Eesusichi paparasache newipatepuamekopua Riosi kokosapuachio. Wahjachi tísia iinyatiame tatakorrichi nokayameoi, tesiwa e'reka ku'ipuapua pu'kaoi, nape aamo inateka naaju ki wa'achi nokiwamechi wichitarekoi muuuai. Eiweka tetewipuapua pu'ka tísia iinya tiame nokayao, aamo kaawe inateka ki amochi chuhkepamichio pu'kao.

### **Kaawe e'reka kaaweruma nayewaniame Riosiwichio**

<sup>24</sup>Ehpeo kajuyachionia, Riosi ahjama nayewamania: “Muuu te'pa kahtiame taamo Noono Riosia, muuuchepua. Muuuchepua tiameo, te'ta taamo neesetoamea, taamoo muuuu, ki ruhjimichio tatakorrichio. Muuuchepua tiameo, taamo ki nohpieme i'tomeri tiamea, te'ta aamo kahtiachiopua tewekachio, aamo kahtiachiopua tísia peenia tiachiopua, wa'a ajasisaopua tísia peenia erapuachio. <sup>25</sup>Muuuche puuuu, te'ta machiwari machiyamea. Muuuche puuuu tiameo, te'ta taamo newipatiamea, Eesusie taamo Paamiraeo, muuuu

apoe amoe Weerariaeo. Pukachipa teemea, pu'ka yooma ki nu'uti aamo iintoriowichioopua taamowichioo, wa'api tiame aamo te'ta weruma iyoriniame, enejeriame teemea, ki nu'uti te'ta weruma utewarieme, ahkasi ki wahjiamesi tiame.”

I'wasi ihji no'o iyotepawaapa. Wa'a teeresa naaju.